

Tesaronakaahiyaapi Utipiho Jiho

Kimandi 1 Tesaronakaahiyaapi Utipimandapi Nesipihande

Poriho aunahipati Tesaronakaahanda piwiha ausaati bimainjati kapihi namasi dosi aunahipati Korindihandaahapi notaise. Noti kapihi Korindihanda bindata utipimandi kimandi jipatipiyahande. Komi jipatipaisura 52 A.D. hura jipatipiyataise. Kiya Awaisihopi windi japihi namaapitaise, tiwi gwinyaapi nanipimatauhi kandapi utipiho kimo jipatipiyahore.

1 Tesaronakaahiyaapi Piwiha Napimasataise

Poriho kiyai ipihirete undisiha (1:1)

Kiyaami giwunyaahotihanduni ami kiyaami gaahaiwa kiyohiwaiwauni kaiwaanahi kaimi niyauhi Poriho usonataati kiyaapi maaritatu kiyai neti mepi autaahemwasitihandapiha (1:2-3:13)

Poriho saiwi saiwi baiwi kaiwise undati kaundisiha kiya baiwi gaahireti kiyotihandapiha (4:1-12)

Awaisiho japihi nasonihura saiwa siyati noaipaitaise undati jipatipaisiha (4:13-5:11)

Awaisiho japihi napitandihandapi baiwi andititiwi jaawi bimitaatiwihandapi kaundati komi piwiha owemati osasepihaasiha (5:12-26)

1 ¹Nini Porihoninithi Sairaasihotithi Timotehotithi maawi bindihaawi kimo utipimo nini Porihonini nyami Apiho Autaahaatihomuni Awaisiho Jisasi Kiraisihomuni kindaramihiyaati Tesaronakaahanda bimohiyihyaatapi jipatipiyataayo. Aisi Autaahaatiho gaahandi nehi sangi nasanyonihahi sahi naanjati yaasahaiwa namepi bipi maariho naasohitanihahi napaisaati bimitaatiwe.

**Kima Piwima Isihiya Aunahipa Awaipati
Tesaronakaahandaahiya Andititiwi Jisaasihopi Giwunyaapi
Titihahi Bimauihi Poriho Kiyaapi Maaritataise**

²Iyataati yaingwanaanini gaapundihaahura nahateweti sapi Autaahaatihoai, 'kinyi gaahone gaare,' undaati gaapundihaayo. ³Iyataati

sahi Apīho Autaahaatihomi ndiheti saiwa kiyohiwaiwaapi gwinyaahaayo. Sahi Jisaasihopi baiwi titihi giwunyaapi titihi ainahiyihyaati bindawaayopo. Aiwi bindawaawi sahi isihiyai maariho nunyohitihandaahi isihiya Jisaasihopi giwunyaitaatiwi otipipati kaiwi anditiwawaayopo. Aiwi sahi baiwi anditiwi nyami Awaisiho Jisasi Kiraisiho japihi nyangi nanyamaitandihandapi jaawi bindawaayopo. ⁴Isi naisihyaati nyamataiwi Kiraisihopi giwunyaahohiyihyaate, sangi akiti Autaahaatiho maariho nasanyataise. Nasamihi sandapi nyahi aimi mmonaati gwinyaahaayo, sahi noaipapi titihi komihyaatimatitaatiwi jihura Autaahaatiho aimi ahisihihyaate. ⁵Aihi sandapi mmonihaawi nyahi Autaahaatihomi piwiha Jisaasihomi kaiwaiwaapiha nehaha ausaawa kasatahaamaato. Owetise. Autaahaatihomi watipihandaahuni Itipihoraahuni ausaahonihi Itipihohoraahi piwiha akitihe, tito ta neti gisunyaataise. Iyataati sahi aimi nyahi sangi anditisaiwitihaawi sangisaati jihura maasi bindihaawi sahi nyami daayaati bimohitihandapi gaahanditihiti, piwiha akitihaare, tiwi mmoniwihyaate. ⁶Aiwi sahihi nyahi kiyohitihanduni Awaisihomi kaindihanduni sahi naasikati kaiwi japepihiriwi kaiwihyaate. Aiwi sahi Autaahaatihomi piwiha nehauhi kandapi isihiya usa naanati yaasahaiwa sangi nasanyauhi sahi maarititaatiwihandi Itipihohoraahi maariwi piwiha newaayopo. ⁷Aiwi sahi isihiya yapipati Masetoniyahandaahiyauni yapipati Akaiyahandaahiya Jisaasihopi baiwi giwunyaahohiyihiyai sahi kiyohipati kati japepihiriwi kaitaatiwi nunjawaayopo. ⁸Iyataati sahi baiwi bimohitihandaahi Awaisihopiha piwiha sahi ausaahohiha nehiti yapipati Masetoniyahandaahuni Akaiyahandaahunihihi notaamaise. Owetise. Aunahipi nahatewaara sahi baiwi Autaahaatihopi giwunyaahotihandapimaawi notaise. Isi nyahi windi sami giwunyaahotihandapi isihiyai kamundito. ⁹Iyataati jihura nyahi sangisenda nasonihi sahi nyangi, 'nga nasawaayopo,' tiwi nanyamaahohitihandapi isihiya kanyatawaatopo. Iyati sahi autaahaatiho jaiwitiwihopi giwunyaapi kiyohiwaiwa ahosumwapi Autaahaatiho akitiho asohoematati jinjapihi bimisihopi nepemaitiwi giwunyaapi komi otipipatihyaatimatauhi isihiya kanyatawaatopo. ¹⁰Iyataati Jisaasiho jihura napwihi Autaahaatiho japihi jomaahipataatihapi ahowimati numwaataise. Iyataati Jisaasiho so Autaahaatihomi apowindihandi nanyamitotihandaatihapi biyaati giwunyaahohiyihyaanangi nanyamaitandihore. Aihi sahi so Autaahaatihomi Mwaaho katohihopi yamihapataatihapi napitaiso, tiwi baiwi jaawi bimauhi isihiya nyangi kanyatawaatopo.

**Poriho Aunahipati Tesaronaikaahanda Jihura Otipipati
Kaindihandapi Tesaronaikaahiya Gwinyaitaatiwi Kaundataase**

2 ¹Iyataati naisihyaati yaingwanaanamataiwi Kiraisihopi giwunyaahohiyihyaate, yaingwanaani jihura sangisenda

nasaati otipipati kiyohipati nehhati kiyahaamaayo. Owetise. Aihi sahi aimi mmoniwihiyaate. ²Iyataati jihura nyahi sangisenda nasaati aunahipa Piripaihanda niyonihi isihiya nyangi nyapi manyihaiwa nanyinyawi sisipinyatiwi ambipati yaasihaiwa nanyinyauhi sahi saiwaapi aimi gwinyaapihyaate. Aiwi kiya naangati yaasihaiwa nyangi nanyinyauhahandi kandi Autaahaatiho anditinyaisihi windi timaamahiyaati andititaati nasaati Autaahaatihomi piwiha Jisaasiho kaiwaiwaapiha sangi nyahi ausaawaati kasatahaayo. Kasatonihis isihiya sami usa, kamaatiwise nyatiwi nyapihatisawaayopo. ³Iyataati nyahi sangisaapihi nasaati Autaahaatihomi piwiha ausaahohitimandi napindape? Sandi nyahi piwiha titihimetihika kasataati apipaahi ainjotati maipihapa kiyaati sangi jaiwisatitihawawi nasahaamaayo. Owetise. ⁴Autaahaatiho nyapi kiya andititiwi nisi piwiha ausaahowo, tati komi piwihaapi nanyisesihi nyahi andititihawayo. Iyahaawi Autaahaatihomi piwiha ausaahaawi isihiya maaritito, taati gwinyaahaawi ausaahaamaayo. Autaahaatiho nyami maarihoaatihi gwinyaahohiwaiwa nahatewa nyasosiho maarititandi ausaahaayo. ⁵Iyataati sahi aimi gwinyaapihyaate, nyahi jaiwitaati atipati nasanyahaamaayo. Iyaati nyahi sapi nyami naisihiyaimatiwi nawiho nanyamito, taati Autaahaatihomi piwiha ausaahaamaayo. Iyataati sandi sataati gwinyaahohitihandi Autaahaatiho aimi mmose. ⁶Iyataati nyahi yawanaanapi Jisaasihomi aposerihyaanini awaisawihyaanisi nyami ambipati awaindepinyamapise, sataati sangisuni isihiya usaisuni sasatitihati kati siyaati windo, taati kamaasato. ⁷Iyataati jihura nyahi sangisaati maasi bindihaawi apopaati waati maahai bipi napaisaati iwinjaati bimipatamatiyaati napaisaati sangisaati bindihaayo. ⁸Iyahaawi maariho nasanyahaayo. Nasanyahaawi Autaahaatihomi piwiha Jisaasiho kaiwaiwaapihaahihika kasatihamaato. Nyami bimitihaahandapi gimunyaawaati naangati yaasahaiwaahihika nehaawi sangi maariho nasanyahaayo. ⁹Iyataati naisihyaati nyamataiwi Kiraisihopi giwunyaahohiyihyaate, sahi aimi gwinyaapihyaate, sahi itihitiwi nandapa nanyamitauhi yaingwanaanini otipipati yaingwanaanami nandapa nawihopihati apatihika otapihaatuni waati kiyahaayo. Kiyahaawi Autaahaatihomi piwiha Jisaasiho kaiwaiwaapiha ausaawa kasatihawayo. ¹⁰Iyataati yaingwanaanini maipihaiwa windi kamaayaati titihika ainahiyihyaanini baiwi Jisaasihopi giwunyaahohiyihyaatami ndihetika bimonihika, akite tiwi mmoniwihiyaate. Aihi Autaahaatihoaisangi mmonahore. ¹¹Iyataati utaaho wo komi mwaahoai biyati kaundipatamatiyaati ninaasiyaatangi kasatonihika aimi gwinyaapihyaate. ¹²Iyahaawi yaingwanaanini sangi anditisiwaati saiwa titihika Autaahaatiho sangi nausainjitihanduni isihiyai iwinjaati bimindihanduni nasamitandika ahisisihika maaritirihiretika bimaawise, satahaato.

**Isihiya Tesaronaikaahandaahiya Kiraisihopi Giwunyaahohiyihiyai
Isihiya Usa Yaawihaiwa Nunyauhihandi Kandi Timaamahiyawi
Andititiwi Bitohauhi Poriho Maaritataise**

¹³Iyataati jihura nyahi Autaahaatihomi piwiha kasatonihahi sahi, Autaahaatihomi piwihe, tiwi newaayopo. Nehotiha sa piwiha nehi utaahomihaamaahe. Owetise. Autaahaatihomi piwiha akitiha newaayopo. Nehauhi ka baiwi giwunyaahohiyihiyaatami omanjititihahi taati gisunyaataaise. Gisunyaainjihahi sandapi nyahi gaapundihaahura nahateweti Autaahaatihohahi, kinyi gaahone gaare,' undihaato. ¹⁴Iyataati naisihyaati nyamataiwi Kiraisihopi giwunyaahohiyihiyaaate, sahi isihiya Kiraisihopi giwunyaahohiyihiyahi Judiyaahandaahiyaamatiyawaayo po. Aihahi Judiyaahandaahiya Jisasi Kiraisihohaisawahi timaamaitohiyihiyahi Autaahaatihomi Piwiha Jisaasiho kaiwaiwaapihahi nehauhi kiyaamihiyahi usa kiyahi yaawihaiwahi nunyawaayopo. Iyataati sangisangi samihiyahi usa Kiraisihopi gimaawunyaahohiyihiyahi naasikati kaiwi sangi yaasihaiwahi nasanyawaayopo. Aihahi sandapi Autaahaatihomi piwiha Jisaasiho kaiwaiwaapihahi aihahi newaayopo, taati gwinyaahaayo. ¹⁵Iyataati jihura Judiyaahandaahiyaami satoya Autaahaatihomi piwiha atiwi nepi ausaahohiyihiyahi yaawihaiwahi nunyawahi tiwawaayopo. Aihahi kiyaami mwaayaisangi naasikati kaiwi Awaisiho Jisaasihohahi sohoahi timapi, aihahi nyangi kiya pohipinyiwahi nepinyamawaayopo. Iyawaawahi Autaahaatihohahi maaritirihireti kamaiwahi koahi ahosumwapi isihiyahi nahatiyaami tiworisaimatawaaayopo. ¹⁶Tiworisaimatauhahi isihiyahi Judaahiyaamatimetahiyahi Autaahaatihohahi japihi kiyahi numwaito, taati Autaahaatihomi piwiha Jisaasiho kaiwaiwaapihahi ausaawa kaundito taatyonihahi Judaahiya usa Jisaasihopi gimaawunyaahohiyihiyahi saiwahi kamaiwise, nyatiwahi nanyisapuwawaayopo. Nanyisapupahi maipihaiwahi pihitiwahi kaimahi niyauhi wani aihahi Autaahaatihohahi pihitahi apousataise.

Poriho Tesaronaikaahiyahi Japihi Usondandi Maaritataise

¹⁷Isi naisihyaati nyamataiwi Kiraisihopi giwunyaahohiyihiyaaate, Judaahiya Jisaasihopi windi gimaawunyaahohiyihiyahi yaingwanaani sangisaati maasi bimito taatyonihahi kiya naanati yaasihaiwahi nanyinyauhi yanhimawaati nasahaayo. Nasaati yaingwanaanini metihonyahi wonyahi saniyahi sapiyahi owehiyaamatiyaaate bindihaayo. Iyahaawahi yaingwanaanini windi sangi maasisonihaahandi kandi yaingwanaanini sapi pihitaati gwinyaahaayo. Gwinyaahaawahi yaingwanaanini sapi maariho tinyatataise. Tinyatihahi yaingwanaanini nasaati jasondihaawahi waati gwinyaahaayo. ¹⁸Gwinyaahaawahi nini Porihonini waati gwinyaataati kurisati sangisenda maasi jinjapihi napiti jasondondiyonihahi Bwaasirihiri daihira nanyisapuwataise. ¹⁹Iyataati ipotihura Jisaasiho japihi

nasonihura komi ndiheti yaingwanaanini napindapi maarititihaawe? Owetise. Sahi piwiha atiwi giwunyaahohitihandapaahihi maaritito. ²⁰Iyataati akitisi sami kiyohiwaiwaapi isihiya mmonawaawi titihitihi kanyatauhi awaindihandi maaritihaawi sangi jasondiha napitihaaawi gwinyaahaayo.

**Porihō Jihura Isihiya Kiraisihomi Naisihiya
Tesaronaikaahiyaapi Timotehoai Natausaasataise**

3 ¹⁻²Iyataati yaingwanaanini windi maasionaati bindihaawi maariho tinyatihi Timotehoai sapi natausaasahaayo. Natausaasahosahi yawahuraani aunahipati Atenjihanda bindihaayo. Timoteho so nyami naisoho nyangisati maasi Jisaasihopi giwunyaahohihore. Iyataati ko nyangisati maasi Autaahaatihomi piwiha Jisaasiho kaiwaiwaapiha ausaahore. Ausaahotihi ko sami Kiraisihopi giwunyaahohitihandi anditisaiwitandi nyahi natausaasahaayo. ³Wiwa sahi yaasati naanijhaiwa nepi japihi timahaitauhi sandapi Timotehoai sapi natausaasahaayo. Iyataati nyahi Jisaasihopi giwunyaahohiyihiyaanini Autaahaatiho gwinyaasimumwaaani kamwaaani naanati yaasihaiwa pihitaati naito. Aihi sandapi sahi aimi gwinyaapihiyaate. ⁴Iyataati jihura yaingwanaanini sangisaati maasi bindihaawi sataati kasatihaato, nyahi Kiraisihopi giwunyaahohiyihiyaanini nahatiyaanini ipotihura naanati yaasihaiwa pihitaati naito, sataati kasatohiha ka kiyati noaipasihi mmoniwi gwinyaawaayopo. ⁵Iyataati sandapi Timotehoai sapi nandusoasataayo. Nini sangi maasioniti bindataati maariho tindihini nini kiya baiwi Jisaasihopi andititwi giwunyaawaayondiho, ndi gwinyaitandi Timotehoai sapi nandusoasataayo. Wiwa Bwaasirihiri atipati nasanyati piwiha kasatonihini Bwaasirihiri nuwipinjawi kiyawaawi nyami piwiha kasatohiwaiwa nehi noti owetitaihi sandapi Timotehoai sapi nandusoasataayo.

**Timoteho Tesaronaikaahanda Niyati Piwiha Gaaha Atisamapi
Japihi Nasati Porihōai Kaundihi Porihō Maaritataise**

⁶Nandusaasonihini nasati Timoteho sami kiyohiwaiwa mmonati atisamapi japihi wani kimo nasati nyainjataise. Iyati Timoteho sami kiyohiwaiwaapiha piwiha gaaha sata kanyatataase: kiya Jisaasihopi baiwi giwunyaapi, ami isihiya usai maariho baiwi nunyawaayopo. Aiwi kiya nyahi maasi kiyaisaati bimohitihandapi gwinyaawaawi nyapi maaritawaayopo. Iyataati nyahi kiyai usondihaawi waati gwinyaahohitihandamataiwi kiyaisangi kati kaiwi nyangi japihi nyasondaatiwi waati gwinyaawaayopo, nyatataase. ⁷Iyataati naisihiyaati nyamataiwi Kiraisihopi giwunyaahohiyihiyaate, yaingwanaanini sapi wiwa maipihaiwa kaiwi japihi timahaitaawo, taati pihitaati maariho

iyahwi gwinyaawaati bimainjaati wani Timoteho sapi, 'kiya nga andititiwi bindawaayopo,' nyatati kanyatihi komi piwihaara maariho winyaitataise. ⁸Iyataati sahi Awaisihopi andititiwi giwunyaapi bimauhi nyahi gaaso, taati maariho witaati bindihaayo. ⁹Iyataati nyami Autaahaatiho sahi andititiwi giwunyaapi bimohitihandapi maarititihaahandi yaingwanaangi nanyinyataise. Nanyamihi yaingwanaanini wihoangi Autaahaatihoai, 'kinyi gaahonje gaare,' undihaato. ¹⁰Apatihi otapihaati gaapundihaahura sangi nasawaati jasonawaati, ami sahi Kiraisihopi giwunyaahohitihandi wapaapi windi nausetihimetitandi nyahi sangi anditisaiwitihawihandapimaawi gwinyaahaayo.

**Porihō Autaahaatihoai Yaingwanaangi Nanyamaasi Isihiya
Tesaronaikaahiyaapihi Numwe Undati Gaapundataase**

¹¹Iyataati nyami Apiho Autaahaatihouni nyami Awaisiho Jisaasiho nyami daihira sangisenda napitihaahira danyaahiwitaise. ¹²Iyataati nyahi sangi maariho nasanyohipatamataiwi sahi isihiya Jisaasihopi giwunyaahohiyihiyaisuni usa baiwi gimaawunyaahohiyihiyaisuni maariho numwitaatiwihandi Awaisiho pihititi nasamitaise. ¹³Siyati nasanyataati sahi gwinyaapi otipipati kaitaatiwihandi neti anditisaiwitaise. Iyataati ipotihura nyami Awaisiho Jisaasiho isihiya komihiyaisati nasonihura sahi Autaahaatihomi ndiheti ainahiyihiyaati gaahiyaati noaipapi bitoaitaapo.

**Porihō Kiraisihomi Isihiya Tesaronaikaahiya
Itatamaniniwi Titihī Bimaawise Undataase**

4 ¹Iyataati nyamataiwi Kiraisihopi giwunyaahohiyihiyaati naisihiyaate, jihura nyahi sangi aimi nahatewa Autaahaatiho maaritirihireti japepihiriwi kaitaatiwihaiwaapi kasato. Aihi sahi aimi japepihiriwi kati kiyawaayopo. Aihi wanisangi Jisaasihomi watipihanda biyaati kasatihaatoni saiwi waati baiwi kaiwise. ²Iyataati nyahi sangi jihura Awaisiho Jisaasihomi watipihanda piwiha kasatitihaawi kanyatihi nasanyohihaapi aimi mmoniwi gwinyaapihiyaate. Aihi kaapi gisunyaatitandi jihaati kasatitihaawiyo. ³Iyataati sahi noaipapi apipaahiyaati kiyaatinihi Autaahaatihomihiyaatimatiwi, ami apipaahi gaahiyaati ainahiyihiyaati sami ambipati usihiya asihiya kihiyaisawi timaamaamaipi titihī Autaahaatihomi isihyaatimatohirihireti daiwi bimitaatiwi Autaahaatiho maaritataise. ⁴Isi usihiyaati aimi asihiyai nepi wirahohiyihiyaati ninaasonjhi Autaahaatihomi isihiya kiyohirihireti kaiwi Autaahaatihomuni, ami isihyaamuni ndiheti kinyi ninaasonyi kiwaamaati baimbi usopi nepi kaati autaahi isiwatipi, ami iwitatamanipi kaatapi maariho gaaho saasanotati popitihō gwinyaape.

Aimbi kaatapi isihiya kiyaami kihiyaisawi timaamaitohiyihyaamihireti kinyi gimunyaape. ⁵Saiwi isihiya Autaahaatihopi gimaawunyaapihya nanihaiwi asihya kihiyai isipi ambipati timaamahiwitaatiwihandapaahihi gwinyaapi kiyohipatamataiwi sahi windi kamaiwise. ⁶Iyawaawi sahi asihya usaamihiyai isipi kiyohiwaiwa isihya usaamihapa ikonihohipatamatiyahapaasi saiwa kamaiwise. Iyataati jihura yaingwanaani biyaati sasatthaato: Isihya saiwa kiyohiyihiyai Autaahaatiho naajati yaawihaiwa numwitaise, satahaato. ⁷Iyataati Autaahaatiho nyangi jihura ahinyisataati kiya maipihaiwa kaito tati ahinyisataamaise. Owetise. Titih biyaati ainahiyihyaanini bimitihaawi ahinyisataise. ⁸Iyataati isihya sami usa kima piwima baiwi atihomiwi ahosumwawaawaahi sandi yaingwanaanangi ahosinyamawaamaayopo. Owetise. Autaahaatiho Itipihopi Gaahore tati nanyamisihoi ahosumawaayopo. ⁹Iyataati sahi isihya Jisaasihopi giwunyaahohiyihiyai maariho numwitaatiwihandapi kasatitihati kati Autaahaatiho aimi neti gisunyaasi windi jihaati kamaasatito. ¹⁰Iyawaawi sahi isihya Jisaasihopi giwunyaahohiyihya nahatiyai yapipati Masetoniyahanda bimohiyihiyai maariho aimi nunyawaayopo. Iyataati naisihyaati nyamataiwi Kiraisihopi giwunyaahohiyihyaate, sahi baiwi waati maariho numwitaatiwihandapi biyaati kasatthaato. ¹¹Iyataati sahi nahariwihaiwa kamaiwi napaisaati bimaawise. Iyawaawi isihya usaami kiyohiwaiwaapi gaaro maipo, tiwi baahaiwi mausoniwise. Iyataati jihura kasatohipatamataiwi sawanaatapihapaapi waati otipipati kaiwise. ¹²Saiwi kiyawaawaahi sahi windi wapaapi nenoahimetitaise. Aisaihi isihya Jisaasihopi giwunyaahohiyihya sapi kiya gaahati kiyawaayowo, tiwi maarititaapo.

**Porih Jisaasiho Japihi Napitandihandapi
Tesaronaikaahiya Kaundataese**

¹³Iyataati naisihya nyamataiwi Kiraisihopi giwunyaahohiyihya satiwi, 'isihya napowawi japihi windi namepapi Autaahaatihoaisawi bimimitaapo,' tiwi gwinyaawaawi pihitiwi maariho asipiyohipatamatimaitaatiwi yaingwanaanini isihya napohiyihyaapi sahi titih gwinyaitaatiwi kasatitihawiyi. ¹⁴Iyahaawi nyahi Jisaasiho napotati japihi nepasitihandapi aimi mmonaati gwinyaahaayo. Isi isihya Jisaasihopi jih giwunyaapi bimambiwi napohiyihiyai Jisaasiho watipihandisati nasonihura Autaahaatiho ahowimahonihi nepasaihi numwaitaise. ¹⁵Aihi yaingwanaanini Awaisihomi piwiha katisiha keti sataati kasatthaato: Awaisiho ipotihura nasonihi sura isihya asiyihya Jisaasihopi giwunyaapi bimohiyihya jih windi siyihya Jisaasihopi giwunyaapi bimambiwi napohiyihiyai nusatipapi naiwi Jisaasihoapih noaipapi koaisawi namutandaapo. Owetitaise.

¹⁶Otipipatiho yamihapataatihi bimisihō awaisihōai Autaahaatiho kaundonihi ko otipiho kapaparihiri ipohonihi ngaatitaise. Gaatonihī suraanihi Awaisihō yamihapataatihi namasi noaatipaitaise. Noaatipahonihi isihīya Jisaasihopi giwunyaapi bimambiwi napohiyihīya jihī nepaitaapo. ¹⁷Jihī nepasaihi suraanihi isihīya kopi giwunyaapi asiyihīya bimohiyihīyauni ami napohiyihīyauni maasi ahoyainjaihi Awaisihomi watipihandaahi numwaasi usondaatiwi naitaise. Iyonihi nyahi Awaisihōaisaati maasi kiyaaninihi jinjapihi bimito. ¹⁸Isi sahi kima piwima Jisaasihō napitandihandapi kasatohīma nahatiyaati Jisaasihopi giwunyaahohiyihīyaati sawanaati nepi ninaasonihī ninaasaanihī kaniwi andititwise.

**Porihō Jisaasihomi Isihīya Tesaronaikaahiya Jisaasihō
Napitandihandapi Timaninaati Jatitihāawo Undataase**

5 ¹Iyataati nyamataiwi Kiraisihopi giwunyaahohiyihīyaati naisihīyaate, Awaisihō siyati ahura japihi napitaise, taati nyahi sangi windi jipatihiyaati kamaasatito. ²Iyataati utaaho ikondandiho napitaiso, tiwi windi gwimunyaapi nehi nanihaiwi bimauhi akohi apatinditihī napipatamatiyati Jisaasihō ahura napitaiso, tiwi isihīya windi gimunyaapi nanihaiwi binyaihi Awaisihō nehi akohi napitaise, sataati nyahi sangi aimi kasatonihī sahi gwinyaapihiyaate. ³Iyataati isihīya Jisaasihopi gimaawunyaahohiyihīya, ‘wani naaḡati yaasihaiwa naitihaahuraamaahe. Wani gaahure,’ tiwi bimitaapo. Binyaihi kiyai neti nusopisāsītandihandi nehi keti noaipaitaise. Iyataati sandi apopaati waati maaha namwitandihandapi maahiwura yaasītandihandi noaipaitaise, tati bimihī yaawitandihandi keti noaipasipatamatiyati noaipaitaise. Naaḡati yaawihaiwa siyati noaipahonihi isihīya kaiwai nemapi windi yamaanihimaitaapo. Nahatiya naaḡati yaawihaiwa naitaapo. ⁴Iyataati naisihīyaati nyamataiwi Jisaasihopi giwunyaahohiyihīyaate, sahi asihatindihandaatapihaiwa kaiwi bindawaamaayopo. Isi asisiha Awaisiha napisura sangi neti yamaasimane, utaaho ikondandiho nehi akohi noaipataati isihīyai neti ko yawimasipatamatiyato. Owetitaise. ⁵Iyataati sahi Jisaasihopi giwunyaahohiyihīyaati nahatiyaati nausainjītihandamihīyaati, ami ipihō otapihaatapi isihīya wapa namoaasawi nahataapa auta kiyohiyihīyaamataiwihiyaate. Iyataati sahuni nyahuni nyahi nahatiyaanini wapa apatinditihī isihīya noasawi kiyohiyihīyaamatiyaati kiyaati bindihaamaayo. Iyaati sandaahi nyahi asihatindihandaatihapihīyaaninīmaae. Owetise. ⁶Isi nyahi isihīya Jisaasihopi giwunyaapihiya nehi nanoposohiyihīyaamatiyaati nanowaatotitihāawīmaae. Owetise. Nyahi biyaati itatamaninaati jatitihāawe. ⁷Iyataati apatihī sura nanoaitaatiwihuraare. Iyataati apatihī sura ami waapohō naharitaatiwihō naniwi naharitaatiwihuraare.

⁸ Iyataati nyahi nausainjiti-handamihiyaanine. Nyami amitiha biyati nyainjapwaa-tonihi biyaati gwinyaitihaawe. Iyaati nyahi itatamaninaati nyami piwiha dahopa yatih i-patisanaati jatitahaawe. Iyaati nyahi nyami Jisaasihopi giwunyaahohiti-handuni isihya usaisi maariho akitinihi nunyohiti-handuni newaati uti apotihiri maatoaatipatamatiyaati niyowa nipaataati niwitahaawe. Iyaati Autaahaatiho nyangi ipotaataati-handi apipaahiyaanangi nanyamaitandi jatohiti-handi tingaatiha watipiha pwisipi yaipati tiwahiraitandihaamatiyaati nipaati-tihaawe. ⁹ Iyataati Autaahaatiho komi apowindihandi nanyamitandi ahinyisataamaise. Owetise. Nyami Awaisiho Jisasi Kiraisiho japihi nanyamaitandi ahinyisataise. ¹⁰ Iyataati Jisaasiho nyapi napotaise. Isi ko japihi napitandihura nyahi asiyihyaanini bimisaihisangi, ami aimi napwisaihisangi nanyamaahonihi koaisaati maasi jinjapihi bimitihaawe. ¹¹ Isi wani kiyohimatamataiwi ninaasiyaatihi sami naisihya Kiraisihopi giwunyaahohiyihiyai napaisaatumapi piwiha kaundiwi kaniwi nepi andititwise.

Poriho Tesaronaikaahiya Piwiha Kima Ipotiha Kaundataase

¹² Aihi naisihyaati nyamataiwi Kiraisihopi giwunyaahohiyihyaate, yaingwanaanini sangi biyaati sataati kasatihaayo: Sahi isihya sangi jainjaawi bindawaawi otipipati sami otihatih waati nga kiyohiyihyaamiha baiwi atiwiwise. Iyataati isihya siyai Awaisiho sangi jainjaawi bindawaawi gwinyaitaatiwihaiwa kasatiwi nasamitaatiwi ahiwihihyaare. ¹³ Aisi sahi kiyaapi otipipati nga kaiwihyaaso, tiwi maariho nunyaw i-kiyaamihatih nuwise. Iyawaawi sahi sami naisihyaisawi itihinniwi timuniwi bipi napaisaati yatihitiwi bimaawise. ¹⁴ Aihi naisihyaate, yaingwanaanini biyaati sataati kasatihaato: Isihya otipipati kamaiwi pohipiyohiyihiyai gwinyaitaatiwihaiwa sahi numwisaihi kiya otipipati kaita baiwi kaundiwise. Aiwi isihya pihitiwi gwinyaapi maariho naanawih bimohiyihiyai maariho napaisaatumapi kaundiwise. Aiwi isihya usa Jisaasihopi baiwi anditimitiwi gimunyaahohiyihiyai baiwi anditiwipise. Aiwi isihya usaisi tariwimundiwi nehi bipi winjasawise. ¹⁵ Iyawaawi isihya usa sangi naanati yaasihaiwa kaiwa kaiwa nasamisaihi wiwa ami naanati yaawihaiwa wihoaan numwitaawi, owetane. Iyawaawi nahateweti sahi baiwi sami naisihya samataiwi Kiraisihopi giwunyaahohiyihyaisuni isihya nahatiya usaisuni titih gaahaiwa kainiwi kawiwise. ¹⁶ Sahi nahateweti jinjapihi maaritwise. ¹⁷ Maaritiwi Autaahaatihopi asisiha nahateweti gaapundiwise. ¹⁸ Iyataati kaiwa kaiwa nahatewa sangisaapihi noaipahonihi kaiwaapi Autaahaatihoai kinyi, 'gaahone gaare,' undiwise. Iyawaawi sahi Kiraisi Jisaasihoaisawi timaamaitohiti-handi ko sangi anditisaihonih saiwa gaahaiwa kaitaatiwi Autaahaatiho maaritataise.

¹⁹Isi Autaahaatihomi Itipiho Gaaho sahi Autaahaatihomihaiwa gwinyaitaatiwihaiwa neti sami omanjititihigi sunyaati, ami kasatonihigi koai sahi namaawisapupwi ami ko kaiwa kasatiwaiwa windi tipindiwi nemaamapise. ²⁰Aiwi Autaahaatiho isihiya usa komi piwiha atiwi nepi ausaahohiyihiyai komi gwinyaati maariwaiwa kiyai neti gwinyaati nunyonihigi kiya sangi kasatisahigi kaiwaapi sahi sami omanjititihigi mimaipaiwi gwinyaapi pohipaiwimaamapise. ²¹Iyawaawi sahi ahoyaniwi Autaahaatihopi gaapundiwi komi ambipati niwimaapi kiyawaahura isihiya usa piwiha kasatisahihigi sahi Autaahaatihomihaare tiwaisahigi sawanaami gwinyaapihigi kasatitaawi sahi baiwi mmoniwi akitihanaaraahigi atiwi nepi isiwatiwigi japepihiriwise. Iyawaawi piwiha nahataisangi sirikireti tipitapaapi mmoniwise. ²²Aiwi maipihaiwaatanihaiwa nahatewa kamaiwi kaiwa namamapise. ²³Isi Autaahaatiho nyahi nyami maariho omanjititihigi yatihinyaitati napaisaatitanihigi bimitihaahandigi nanyamisiho, sami maariho ambipati nahandigi neti titihigi gaahiyaati ainahiyihiyaatesamahonihigi, bimaami nuwi nyami Awaisihigi Jisahi Kiraisihigi japihigi nasonihura maipihaiwaapi piwiha owehiyaati Autaahaatiho sawahomataiwihiyaati noaipaitaatiwe. ²⁴Autaahaatiho sangi japihigi nasamaitandigi gaatati nasamaati ahisisihigi nga jainjagi bimitaise. Ko Gaahosigi komi piwiha sangi nasamaati jainjatitandigi timanati kasatisihigi ka japepihiratigi sangi nga anditisaiwatigi jainjaatigi bimaami notigi Jisahi Kiraisihigi nasonihuraatitaise.

²⁵Naisihiyaatigi nyamataiwigi Kiraisihopigi gwinyaahohiyihiyaate, Autaahaatiho yaingwanaangigi anditinyaiwita sahi gaapundiwise. ²⁶Iyawaawigi isihiyagi Kiraisihopigi gwinyaahohiyihiyagi nahatiyai maariwigi gerundiwi ikwiri ahowiwise. ²⁷Ninigi Awaisihigi Jisahi Kiraisihigi maariwigi sapi kiya saitotatigi gwinyaasirihiretigi japepihiritigi komi watipihandigi watipindi sangi sasatataato: Kimandigi utipimandigi awitiwigi naisihiyagi Kiraisihopigi gwinyaahohiyihiyagi nahatiyai ausaapi autagi kaundiwise.

²⁸Nyami Awaisihigi Jisahi Kiraisihigi nyahi gaahapagi wapagi kamaayaatigi nehigi komi gaahandigi nanyamindihandigi sangisatitane.